

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA

KANTONALNI SUD U NOVOM TRAVNIKU

Broj: 06 0 Reg 014874 21 Pž

Novi Travnik, 21.10.2021. godine

Kantonalni sud u Novom Travniku u vijeću sastavljenom od sudija Senad Begović predsjednik vijeća, Stana Imamović i Mirjana Grubešić članovi vijeća, u registarskom postupku upisa smanjenja osnovnog kapitala u društvu PUP „UNIVERZAL BRAJIC“ d.o.o. Travnik, zastupan po direktoru A.A., odlučujući o žalbi PUP „UNIVERZAL BRAJIC“ d.o.o. Travnik, izjavljena protiv zaključka Općinskog suda u Travniku broj 051-0-Reg-20-000309 od 19.08.2020. godine, u sjednici vijeća održana 21.10.2021.godine donio je sljedeće:

RJEŠENJE

Odbacuje se kao nedopuštena žalba PUP „UNIVERZAL BRAJIC“ d.o.o. Travnik izjavljena protiv zaključka Općinskog suda u Travniku broj 051-0-Reg-20-000309 od 19.08.2020. godine.

Obrazloženje

Osporavanim Zaključkom je naloženo žalitelju da u roku od 15 dana dopuni prijavu za upis promjena smanjenja osnovnog kapitala u skladu sa Zakonom o privrednim društvima Federacije BiH, tako što će navesti jasne razloge za smanjenje temeljnog kapitala, kako bi moglo ispitati da li su ispunjene pretpostavke za upis traženih promjena i donijeti pravilna i zakonita odluka, da se očituje na nalaz vještaka Miroslava Radoš u odnosu na pokretne stvari koje čine temeljni kapital, budući da osnivač društva navedene pokretne stvari nije unio u društvo kao temeljni kapital i da dostavi izjavu uprave društva na okolnosti da li je nakon objave odluke o smanjenju temeljnog kapitala bilo prijava povjerilaca za neizmirena potraživanja, odnosno ima li Društvo neizmirenih potraživanja i da li su date garancije za izmirenje eventualnih potraživanja. Istim zaključkom žalitelj je upozoren na odredbu člana 54. stav 3. Zakona o registraciji poslovnih subjekata u Federaciji BiH („Službene novine Federacije BiH“ broj 27/05, 68/05, 43/09 i 64/14).

Protiv navedenog zaključka žalitelj je izjavilo žalbu i ističe da je Društvo u teškoj situaciji, zbog čega je i odlučeno da se smanji osnovni kapital, da je odluka o smanjenju kapitala donesena u skladu sa članom 349. Zakona o privrednim društvima Federacije BiH i notarski obrađena i sačinjena na osnovu nalaza vještaka mašinske struke koji je utvrdio da je vrijednost osnovnog kapitala u trenutku procjene 26.870,00 KM, a da je temeljni kapital u iznosu 327.486,00 KM formalno upisan u sudskom registru, da Društvo nema obaveza prema svojim povjeriocima i da se odlukom o smanjenju kapitala u sudskom registru želi prikazati realno stanje Društva, da su uz zahtjev dostavili svu potrebnu dokumentaciju, da je odluka o smanjenju osnovnog

kapitala 12.08.2020. godine objavljena u Službenim novinama Federacije BiH i da nije bilo prijava povjerilaca za eventualno potraživanje. Iz navedenih razloga smatra da su ispunjene pretpostavke za upis promjena smanjenja osnovnog kapitala. Stoga predlaže ovom sudu da žalbu uvaži i donese odgovarajuću odluku. Uz žalbu dostavlja kopiju Službenih novina o objavi odluke, izjavu direktora Društva od 31.08.2020. godine i pobijani zaključak.

Nakon što je ispitao osporenu odluku u granicama navoda iz žalbe i po službenoj dužnosti u smislu člana 221. Zakona o parničnom postupku („Službene novine Federacije BiH“ broj 53/03, 73/05, 19/06 i 98/15) i odredbi člana 63. do 66. Zakona o registraciji poslovnih subjekata u Federaciji BiH („Službene novine Federacije BiH broj 27/05, 68/05, 43/09 i 64/14)), odlučeno je kao u izreci ovog rješenja iz sljedećih razloga:

Članom 54. Zakona o registraciji poslovnih subjekata u Federaciji BiH je propisana obaveza registarskog suda da u roku od 3 dana od dana prijema prijava za upis promjena upisanih u registarskom ulošku, provjeri da li su uz prijavu dostavljene sve potrebne isprave u skladu sa drugim relevantnim propisima u Federaciji BiH kojim se reguliše osnivanje, uređenje i poslovanje privrednih subjekata i da će sud zaključkom naložiti podnosiocu prijave da u ostavljenom roku, koji ne može biti duži od 30 dana, dopuni prijavu ako utvrdi da je suprotna relevantnim propisima ili ako uz prijavu nisu dostavljene isprave potrebne za donošenje pravilne i zakonite odluke i da će prijava za upis biti odbačena ako u ostavljenom roku ne bude dopunjena na način kako je to naloženo zaključkom, a članom 57. stav 1. u relevantnom dijelu za odluku u ovoj pravnoj stvari je propisano da su odluke registarskog suda rješenja i zaključci, da se rješenjem odlučuje o zahtjevu za upis osnivanja i svih promjena podataka od značaja za pravni promet koje se upisuju u sudski registar, a zaključkom o procesnim pitanjima i da se u postupku upisa u registar na pitanja koja nisu uređena ovim zakonom, shodno primjenjuju odgovarajuće odredbe Zakona o parničnom postupku. Članom 63. stav 4. istoga zakona je propisano da protiv zaključka donesenih u postupku upisa pravnih subjekata u sudski registar i upisa drugih promjena značajnih za pravni promet, žalba nije dopuštena.

Kako protiv zaključka donesenog u postupku pred registarskim sudom u smislu člana 63. stav 4. a u vezi sa članom 57. stav 6. Zakona o registraciji poslovnih subjekata u Federaciji BiH, žalba nije dopuštena, odlučeno je kao u izreci ovog rješenja po osnovu člana 235. tačka 1. Zakona o parničnom postupku.

Predsjednik vijeća
Senad Begović